

Du vadienst mehra – Wahlprogramm für die Stadtratswahl Passau auf Bayrisch

Damits Lem ned vo da Mietn aufgfressn wird

Zvui Leid geman vui zvui Geyd fias Wohna aus. Schuid san gscheade Vamieter, de de Mietn ollawei auftreim und gstiegne Nebenkostenabrechnungen ausnutzn um mid völlig wuide Abrechnungen vo de Heizkosten Profit auf de Kostn vo de Mieter*innen z'mocha. Des loss ma uns nimma gfoin. Weil hohe Mietn voin ned vom Himme.

Deshoib setz ma mia uns ei

- fia an Mietndeckl fia Wohnungen de da Stod Bassau ghean. D'Stod Bassau muas seine eigenen Wohnungsgseyschaftn in d'Pflicht nemma, nimma d'Mietn zum erhöh'n. Fia de Wohnungsgseyschaftn vo da Stod Bassau muas geytn, dass de Mietn nimma hea wean.
- dafia, dass d'Stod konsequent kontrolliert, ob se da Vamieter eh ans Gsetz hoid oder ausgschamde Wucher-Mietn verlangt. Damit wiads fia di a billiger.
- gega Schicki-Micki-Apartments fia a boa Wenige und fia bezahlbare Wohnungen für Olle: D'Stod soi bloß no Sozialwohnungen nei baun und bei private nei baute Wohnungen miassn 70% Sozialwohnungen dabei sei.
- fia a Zweckentfremdungssatzung, des hoast, de Leid de vamietn san verpflichtet, laare Wohnungen zu vamietn und Ferienwohnungen wieda ois normale Mietwohnungen azumbietn.
- dafia, dass kommunale Grundstickl nur dann obgem wean, wenn a bezahlbare Mietn garantiert wean: zum Beispui durch Erbpachtverträge oder mit da Vagabe an Genossenschaftn und solidarische Bauprojekte.

Dafia, dass'D überroi hikimmst

Im Lenz woid da Stadtrat d'Busse kirzn. Des homma mia mit ana Petition verhindert! Bassau braucht a Verkehrsplanung, de se an die Bedürfnisse vo de Leid in Bassau orientiert. Deshoib homma mia unsa Bürgerbegehren „Bus fia Olle“ gstartet! Mia mecht ma a Bassau, wo ma an guad ausbaudn Nahverkehr und sichane Fuaß und Fohradlweg hom, dass olle Leid ohne Hudln vorwärts kemman, völlig wuascht weychs Verkehrsmittel.

Deshoib setz ma mia uns ei

- fia an Bus, der so foht, wia na de Leid in Bassau brauchan: eftas, unta andam bei de Linien 5 und 6, wo ma an erstn Zug nach Minga dawischt, werkdogs bis umma zweyfe af d'Nocht, am Wochenende bis umma zwoa af d'Nocht und a bessane Anbindung an d'Oidstod
- fia Fahkoatn, de umsonst san fia olle de wo ind Schui mias sowia auf lange Sicht Öffis de umsonst san. Bis dod hi guyt: Leid, de se an Bus ned leistn kennan, weis ned gnuag Geyd hom, deafan ned dafia gstroft wean, wenna a moi koa Fahkoatn hom

-Leid, de mim Roistuy oder mim Kindawogn unterwegs san, oder Leid, de schlecht segn oda hean, brauchan barrierefreie Haltesteyn, Busse und Aushäng sowia Fahrplaninformationen

-fia a gschmeidigs Parken außahoib vo da Stod, wo ma mid am Bus, dea umsonst is im Viertelstundn-Takt in d'Innenstod einefohn ko

-fia sichane Radlweg und Fuaßweg ohne Barrieren.

Mei Körper, mei Entscheidung

In ganz Niederbayern gibt's nua zwoa Praxn, wo ma Schwangerschaftsabbruch mocha lossn ko. Mia meng ma de Lage vo da Vasorgung vabessan und setz ma uns deswegn ei dafia

-dass Schwangerschaftsabbrüche nach der Beratungsregelung am städtischen Klinikum gmocht wean kinnan

-dass mehra Leid am Klinikum eigsteyt wean, de a de Ausbildung fia Schwangerschaftsabbruch hom

-dass der narrische Stadtratsbeschluss nimma geyt, der des im Moment vahindert

-dass gnuag Geyd fia unabhängige Beratungssteyn do is.

Fia a Stod, in dera's olle guad geht

Mia mecht ma a Stod mit Zukunft, de sozial gerecht is und a dass se Bassau aufn Klimawandel eisteyt.

Deshoib setz ma mia uns ei

-dafia dass ma an Bodn vom Beton befreit und vui mehra Grea auf unsare Stroßn und Heisln kimmt.

-gegas Himocha vo greane Flechn und Siedlungen. Des hoaßt obacht, wenn nochbaut wird

-fia a Umgebung, wo ma se gean aufhoid, ohne dass ma ebbs zoin muas oda unta Generalverdacht steht wia bei da Videoüberwachung

-fia mehra Gscheftl, Wirtsheisl und Kultur vo private Leid, statt große Konzern.

-gegas Sterm vo Festivals, Diskos und Danzstadln Nacht- und Wirtshauskultur

-fia a gseyschaftlichs und scheens Miteinand mit olle ohne dass ebba ausgeschlossn wiad.

Guade Oabat statt dass ma se ausbeuten lossn muaß

In Bassau miassn vui zvui Leid fia vui zweng Geyd oabatn, daweil stopfn se de großn Konzern Toschn voi. Du host mehra vadiant! Mit Oabat muaß ma Sicherheit, Würde und Mitbestimmung hom.

Deshoib kempfan mia

-fia an Mindestlohn vo 16 Euro in olle kommunaln Bereiche

-fia an Tarifvatrog a fia olle, die bei Betriebe vo da Stod oabatn

- dafia, dass Aufträge nur an Betriebe gengan, die nach Tarif zoin
- dafia, dass ma Betriebe fördert, de vo da Belegschaft aus gleit wean und ned de großn Konzern.

Städtische Betriebe: Gmoane Leid voa Profit

D'Stodwerke san uns ois gmoane Leid vapflicht und deafan ned nur aufs Geyd aus sei.

Deshoib kempfan mia

- fia a Vasorgung mit Strom, Wossa und Werm, die olle zoin kennan
- fia a Vasorgung mit 100% greana Energie aus Sun, Wossa und Wind aus da Region
- fia Freizeitangebote (z.B. PEB) zu Preise, de se olle leistn kinnan
- fia an Aufsichtsrat, der sein Nom a vadiert und ned bloß ois abnickt!

Mitm Schutz vom Klima griang ma a billigere Energiepreise

D'Sun und da Wind steyn uns koa Rechnung. Mia mecht ma billige Preise für olle Hausoid!

Deshoib setz ma mia uns ei

- fia Solaranlagn auf olle Dachl vo öffentliche Gebäude
- fia an billigen Solarstrom fia Mieter*innen und WEGs
- dafia, dass Balkonsolaranlagn gfördert wean
- fia Gründungen vo Bürgerenergiegenossenschaften
- dafia, dass umweltfreundliches Hoazn gfördert wiad.

De Brandmaua – des samma mia

Bassau soi a Stod sei, wos koan Blotz gibt fia Rassismus, Antisemitismus und rechte Hetzn. Mia setz ma uns für a weytoffns, demokratischs und solidarischs Bassau ei, des se aktiv gega Faschismus eisetzt und fia a starke Erinnerungskultur. Deshoib

- koane kommunalen Räume für Faschist*innen
- dass ma Vereine und Initiativen unterstützt, de se fia Antifaschismus und Demokratie eisetzn
- Dass ma endlich den Erinnerungsweg „Jüdisch to go“ von de Schüler*innen vom Leopoldinum in Bassau umsetzt
- Strossn, die nach Nazis benannt san, kean umbenannt